

**Inissianik attartortitsisarneq pillugu Inatsisartut peqqussutaata § 60-ip allannguutissaanik kingusinnerpaamik UKA 19-mi saqqumiusseqqullugit Naalakkersuisut peqquneqarnissaanik inatsisartut aalajaangiiffigisassaattut siunnersuugut. Taamaalilluni attartortup toqukkut qimagunnerani utoqqat illuanulluunniit nuunnerani inoqutigiinni najugaqartut inigisaminnik anisinneqarsinnaanerannik pitsaanagerusumik illersorneqarsinnaasunngorlugit. Uani ilanngullugu § 60, imm. 2, uniffiup appaa peerneqassasoq, taamaalilluni aamma § 60, imm.1 aamma 2 allanngortinneqassasut ukiut marluk najugaqarnissamik piunasaqaataasup qaammatinut arfinilinnut allanngortinneratigut.**  
(Inatsisartuni ilaasortaqaq Peter Olsen, Inuit Ataqtigiit)

### **Akissuteqaat**

(Ineqarnermut Attaveqaqatigiinnermullu Naalakkersuisoq)

### **Aappassaannerineq**

Naalakkersuisut sinnerlugit Sanaartornermut Ataatsimiititaliaq isumaliutissiissuteqarneranut qutsavigaara.

Inatsisartuni ilaasortat eqqaamassagunarpaat, siunnersuutip siullermeerneqarnerani Naalakkersuisut inassutigaaat siunnersuummi attartortitsisarnermut inatsisissap nutaap suliarineqarnissaa utaaqqimaarneqassasoq, taannalu piffissamik pissuteqartumik 2020-imi Inatsisartut upernaakkut ataatsimiinneranni aatsaat saqqummiunneqarsinnaasooq, tassanilu aalajangiiffigisassatut siunnersuut ilanngunneqassalluni. Taamatuttaaq attartortitsisarnermut inatsisip iluarsaanneqarnissaa ataatsimut isigalugu pisariaqartinneqartoq Naalakkersuisut isumaqatigigaat, siullermeerinerup nalaani paasissutissiissutigineqarpoq.

Taamaattoq Sanaartornermut Ataatsimiititaliap siunnersuutip akuerineqarnissaa inassutigimmagu Naalakkersuisut tusaatissatut tiguaat, tassanilu allassimavoq:

*”Sanaartornermut ataatsimiititaliap isumaqatigiittup siunnersuut pillugu oqaatigissavaa: Inissianik attartortortitsisarneq pillugu peqqussut § 60-ip allanngortinneqarnissaanut qulakkeerneqartariaqarpoq, siunissami inissiamik attartortittakkamik tigusinissamut akuersisoqarnissaanut qaammatit arfinillit kingullit tunngaviussammata. Peqatigisaanik utaaqqisutut allattorsimaffimmi allassimanissamik piunasaqaatigineqartoq peerneqassaaq, § 21-mi siusinnerusukkut soorlu taarna pisoqareersimasooq.*

*Inissianik attartortitsisarneq pillugu peqqussutip allanngortinneqarnissaa pillugu inatsisissatut siunnersuummik saqqummiussaqaqarnissaaq pillugu siusinnerusukkut aalajangiinerit malitseqartitsisoqarnissaanik Sanaartornermut Ataatsimiititaliamit tamatumunnga atatillugu Naalakkersuisut kaammattorpai.”*

Naalakkersuisut tamatuma kingorna siunnersuut akuerineqassasoq inassutigaaat.